

# Gea ad Olimpia 2022 cun intgins dubis

Il cussegl grond sustegna la candidatura

■ **(anr/fa) Cun gronda majoritad ha sustegnì il cussegl grond la candidatura grischuna. Cun 100:16 vuschs ha decis il parlament da cussegljar a la populaziun grischuna da dir ils 3 mars 2013 gea a la candidatura grischuna.** La debatta d'entrada davart l'eventuala candidatura dal Grischun per ils Gieus olimpics d'enviern 2022 ha durà glindesdi quatter uras. Ier damaun ha preschentà cusseglier guvernativ *Hansjörg Trachsel* ses puncts da vista. Ordavant ha'l menziunà che tut la regenza sustegna la candidatura, «Jäger sco schef dal sport, Cavigelli dal traffic, Janom Steiner da las finanzas, Rathgeb da la segirezza e jau sco minister da l'economia publica.» Ch'els tuts sustegnian il nov concept da far gieus pitschens ed alvs, ha'l menziunà.

## «Profitar da la forza dals rintgs»

Trachsel ha affirmà ch'il studi davart la realisabladad mussia che Gieus olimpics cun effects positivs durabels sajan pussaivel. En quai ch'i regardia ils custs ha'l declarà che la Svizra sorprendia la realisaziun da quels e portia era il deficit. «Sche ina milliarda francs n'avessan betg da bastair retira il pajais da l'onn 2015 sia candidatura.» La finamira dals Gieus olimpics en Grischun è tenor il cusseglier guvernativ che la Svizra ed il Grischun possian sa preschentar internaziunalmain cun lur cumpetenzas-clav sport d'enviern, dun per organisar ed ospitalità. «L'olimpiada rinforza dentant era il spiert da cuminanza en Grischun», ha agiunt Trachsel, «ils rintgs olimpics avessan la forza da manar a giuven e vegl en las muntognas.» Cun 100:16 vuschs ed 1 abstenziun da la vusch ha decis il cussegl grond da tractar en detagl la candidatura eventuala per l'olimpiada d'enviern 2022.

## Naufrazi per «concept da svilup alternativ»

La minoritad da la cumissiun predeliberanta represchentada da *Jon Pult* (ps,



Ier damaun ha preschentà cusseglier guvernativ Hansjörg Trachsel ses puncts da vista.

FOTO Y.BÜRKL

Cuira) aveva fatg la dumonda da renviar l'affar a la regenza cun l'incumbenza da preschentar per alternativa in concept da svilup: Enstagl da la candidatura per l'olimpiada fissi stà dad elavurar programs structurali per rinforzar il svilup dal turissem grischun sco era per renovar las infrastructures dal traffic. Sco la majoritad da la cumissiun ha refusà era il cussegl grond questa proposta cun 100:16 vuschs ed 1 abstenziun da la vusch. Cusseglier guvernativ Hansjörg Trachsel ha manegià che la finanziaziun per renovar las infrastructures dal traffic saja cun in gea a la candidatura per l'olimpiada quasi garantida era da vart da la confederaziun.

## Dimensiuns memia grondas per il Grischun?

Il fil cotschen da la discussiun en detagl era la dumonda «Nun è il Grischun memia pitschen e sias vals e lieus memia giu'd via per in'occurrenza uschè gronda sco l'olimpiada?» *Christoph Jaag* (ps, Schiers) ha dumandà, sch'ils aderents da la candidatura hajan era resguardà la situaziun topografica difficila dal Grischun. Cusseglier guvernativ Trachsel l'ha respus che las vias a Sestriere eran pli nauschas che quellas en Grischun. *Jon Domenic Parolini* (pbd, Suot Tasna) ha ditg ch'il traffic principal vegnirà baingea giu dal nord, ina part però era da l'ost e dal sid: «Perquai fissi bun, sch'il traffic public pudess transportar als visitadurs

davent dals cunfins naziunals en Engiadina Bassa, Val Müstair, Puschlav e Bergiaglia fin als lieus da l'olimpiada San Murezzan e Tavau.» El ha dumandà, sch'i saja previs da megliorar questas vias chantunalas, per ch'ellas sajan ablas da dumagnar tut il traffic. Cusseglier guvernativ *Mario Cavigelli* ha respus che quai na saja betg il cas en vista a l'olimpiada, «quests projects, tant en Engiadina Bassa sco era da Malögia a Segl-Maria vegnan realisads cun meds ordinaris per la construcziun da vias.»

## Contribuziuns chantunalas a la candidatura

Sch'il suveran grischun di ils 3 mars 2013 gea a la candidatura grischuna per l'olim-

piada 2022 surprena il cussegl federal la mesadad dals 60 milliuns francs custs per la candidatura, 15 milliuns surprena Swiss Olympic, 5 milliuns San Murezzan sco Host City e 2 milliuns Tavau. Al chantun Grischun resta ina cumpart dad 8 milliuns francs. Enpli ha il chantun l'intenziun da furmar 300 milliuns francs reservas per l'import da 300 milliuns francs per la realisaziun dals Gieus olimpics dal 2022 a San Murezzan e Tavau. Per pudair far quai dovre in revisiun parziala la lescha davart las finanzas chantunalas grischunas. Quella revisiun è sutmissa al referendum facultativ. *Sandra Locher Benguerel* (ps, Cuira) ha fatg la dumonda da sutmetter quai al referendum obligatoric, «uschia avess la populaziun grischuna ils 3 mars pled en chapitel era davart quests 300 milliuns.» Quella dumonda ha la cumissiun approvà unanimamain e proponì dad integrar il «referendum obligatoric» en la dumonda davart la revisiun parziala. La presidenta da la regenza *Barbara Janom Steiner* ha declarà ch'ins stoppia sclerir, sche quai sa cunfetschia cun il dretg vertent. Quai tracta il cussegl grond mesemna.

## Unanimamain en quai ch'i riguarda il deficit

Las autras dumondas ha tractà il parlament gia ier: Cun 96:14 vuschs ed 1 abstenziun da la vusch ha approvà il cussegl grond il credit d'impegn che s'amunta ad 8 milliuns francs. Cun 99:16 vuschs ed 1 abstenziun ha acceptà il parlament la revisiun parziala da la lescha da las finanzas chantunalas, la quala pussibilescha da far reservas per l'import da 300 milliuns francs. Cun 116:0 vuschs ha acceptà il parlament la formulaziun «Per la realisaziun dals Gieus olimpics èsi exclus ch'il chantun Grischun surprena in deficit». E cun 100:16 vuschs ed 1 abstenziun ha il parlament decis da cussegljar a las votantas e votants grischuns d'approvar la candidatura per ils Gieus olimpics 2022 en Grischun.